

't Herenhoentien



BESTE KIENDER!

Et duurt misschien nog evenpies, mar dan hebben we weer een heerlike, lange zommervekaansie veur oons. De dieren in de bos van Piepmoes hebben d'r hiel vule zin an. Zi'j bin allegere al an et bedaenken wat ze dan allemaol wel niet doen zullen. Et roodbossien en de gelegouw willen, as et mooi weer is, alle daegen naor de Lende om in et waeter te badden. De doeve wil ok wel een keertien mit, mar hi'j wil ok es even noflik bekommen in et schaad van zien boom. Daor het hi'j een heerlike hangmatte in hangen, zie. De beide honnen, Diedel en Daweltien, moe'n mit de baos mit. Die gaot mit de auto naor een veer en waarm laand, en daor hebben de honnen now echt hielemaole gien spat nocht an. Ze weren veul liever naor de bos van Piepmoes gaon, of naor de Lende. Mar ja, de baos is now ienkeer de baos en daor hebben ze naor te luusteren. Aarme honnen! Klaos de kaeter en Miep, zien vrundinnegien, kriegten et niet veul beter. Zi'j moe'n een peer weken naor een dierepension. Heur baosies gaon ok een hiel aende vot. Mit et vliegtuug alderdeegst! Now, en daor willen ze de katten niet in mit hebben. Et zol ommes op de kop verkeerd gaon mit die beide. Mar ze laoten de katten ok niet thuus. Dat zol vanzels best kunnen, as et gewone katten weren, temeensen. Mar ja, Klaos en Miep bin now ienkeer gien gewone katten, ze haelen altied kattedwaod uut, dus dat kan niet, dat wodt niks. Dus moe'n ze naor et pension. En Piepmoes dan? Zol die al vekaansieplannen hebben? De moes gaot vast wel wat onderneemen, die gaot niet sloeg in zien kesteel veur him uut zitten te steren. Dat kan ik me niet veurstellen, temeensen. Mar misschien staot dat allegere wel in et verhael dat op de volgende bladziede begint. Laot jim dat mar gauw es veurlezen!

Op et inlegvel en achterop dit kraantien staon allegere spullegies en/of doedingen die mit et Piepmoesverhael te maeken hebben. Veul plezier d'r mit, en een hiele goeie vekaansie!

't Herenhoentien verschieit vier keer in et jaor en is bedoeld veur de eerste vier groepen van et basisonderwies in Oost- en West-Stellingwarf. Et wodt saemensteld en klaormaekt deur Gery Scholten en Sietske Bloemhoff van de Stichting Stellingwarver Schrieversronte in Berkoop (till. 0516-451108).

PIEPMOES IN DE TENTE

(Een veurleesverhael van Sietske Bloemhoff)

Et is zowat een maand veurdat de zommervekaansie begint. De molle, jim weten wel, de buurman van Piepmoes, zit mit de moes in die zien kesteel te kaartspeulen. Ze doen et spullegien pesten. 'Laeste kaarte,' raost Piepmoes. 'Uut! Ik win et al weer van je, molle!'

'Tsja,' zegt de molle. 'Ik bin d'r mit mien gedaachten niet hielemaole goed bi'j. Dat komt... Weej' waar ik now al een hiele poze an zit te prakkeseren, Piepmoes,' gaot hi'j dan veerder, dat et mi'j zo mooi toelieken zol om es een keer in een tente op vekaansie te gaon. Jow dan?' 'Op vekaansie. In een tente,' mompelt de moes. 'Molle, hoe koj' d'r op.' De moes smit de kaarten an de kaant. 'Dat liekt me prachtig. Doen we. Wanneer gaon we?' vragt de moes die slim van opschieten hoolt.

'How, how, kalm an,' zegt de molle. 'We moe'n eerst es zien wanneer et vekaansie is. En we moe'n et d'r over hebben waar we henne zullen. En misschien wel et alderbelangriekste, hoe kommen we an een tente? Heb ie d'r iene, of weet ie misschien iene die een tente het?'

'Zo'k zo niet weten,' antwoordt Piepmoes. 'Ik heb d'r zels niet iene. Mar we kun misschien wel iene maeken. Van een peer dekens of klieden, of zo.'

'Dat zol misschien wel kunnen,' daenkt de molle mit de moes mit. 'We kun et vanzels eerst ok es uutperberen. Dan maeken we een tente hier bi'j jow in de tuun en dan slaopen we daar eerst een peer nachten in. Gaot et dan allegere goed, dan waogen we et d'r op. Wat vien ie?'

'Goed idee, molle,' nikt Piepmoes. 'Kom mit, dan gaon we mitien an de slag. Lao'we eerst mar es een mooi plakkien opzuken.'

Daor stappen de beide burenen henne. Dan es kieken ze in et iene hoekien, dan weer in et ere. Uuteindelijk bin ze et d'r over iens. Et hoekien bi'j de bos, dat is et mooiste plakkien.

'As ie now es wat paolen en latten bi'j mekaander zuken,' bestelt Piepmoes de molle, 'dan kiek ik even op 'e zoolder as ik wat dekens en klieden en zo vienen kan.'

'Best,' vint de molle, 'ik heb, donkt mi'j, vlak bi'j huus nog wel wat liggen zien.'

Een posien laeter het de molle van alles in de tuun van Piepmoes sleept. En kiek, daar komt Piepmoes ok an, hi'j het zovule dekens en klieden in de hanen, dat hi'j die haost niet holen kan. En dan gaon de beide dieren an de slag. Ze maeken eerst een raemwark van et hoolt veur de tente. Ze zetten daarveur drie paolen tegen mekeer en bienen die an de boverkaante goed an mekaander vaaste. Dat doen ze nog een keer en zetten de beide bouwarken op een ofstaantien van mekeer goed stevig henne. Dan leggen ze an de boverkaante een latte van de iene serie paolen naor de ere toe en bienen die ok goed vaaste. Halverwege de paolen bienen ze nog es weer een latte. Dan lopen ze een aentien achteruut en bekieken et risseltaot.

'Prima,' mient de moes.

'Vakwark,' vint de molle.

'Now de dekens en de klieden,' zeggen ze toegelieke.

Nao een kertier liggen de dekens en klieden over et geraemte. Mit waskniepers knieperen de beide dieren alles an mekaander vaaste. An ien kaante hebben ze een stokkien eupen laoten om in en uut de tente te kunnen.

'Zo, die is klaor,' poest de moes.

'Dat ha'k docht,' hiemt de molle, 'en now de rest,' gaot hi'j veerder.

'Hoezo de rest,' vragt de moes, 'de tente is toch klaor?'

'Waar wol ie dan zitten en slaopen en zo.' De molle kikt verbaosd naor de moes. 'We kun toch naachs niet zomar in et grös liggen gaon?'

Nee, dat kan niet, dat is Piepmoes wel mit zien buurman iens. Dat ze beginnen weer opni'j te slepen. Een peer bedden, beddegoed, een peer stoelen, een taofeltien, glaezen, bodden, pannen, potten, een lanteern en gao mar deur. Jim kun vast ok nog wel wat bedaenken.

'En et kaartspul,' schöt et de molle in 't zin. 'We kun vanaovend mooi een pottien kaortspeulen in de tente. Dan za'k jow es even zien laoten wat kaorten is. Dan verslao ik jow,' pocht hi'j. 'Molle dan toch,' gniest Piepmoes. 'Reken d'r mar niet op dat ie van mi'j winnen kunnen.'

Aovens, as ze et eten op hebben, pakken ze et kaartspul. De molle schuddet de kaorten en dielt ze uut. Et eerste pottien kan beginnen. Et is vot-en-daolik spannend. Et liekt d'r op dat de molle mitien winnen zal. Hi'j kikt d'r zuver al een betien eigenwies van. Mar nee, et is weer Piepmoes die wint. En moej' die moes es gniezen zien. Aarme molle. Gelokkig gaot et volgende pottien een stok beter. Mar krek as de molle daenkt dat hi'j dit pottien wél winnen kan, heuren ze in de veerte een nuver, wat rommelend, geluud.

'Niet op letten, molle,' ropt Piepmoes vol vuur. 'Kom op, gao deur, wie wet win ik toch nog.' Dan heuren ze et gerommel opni'j, mar wel een stok dichterbi'j...

'Wat is dat toch.' De molle gooit zien kaorten op 'e taofel. Hi'j het et nocht d'r in ienkeer of. 'Zo ongeveer klinkt et ok as d'r een koe over de grond boven mien huus lopt. Mar dan zit ik veilig onder de grond, en now niet.'

't Zal wel wat mitvalen,' mient de moes. 'Pak je kaorten mar weer, molle. As we dit pottien uutspeuld hebben, gaon we lekker slaopen, en dan heuren we d'r niks meer van!'

Mar dan begint et inienen toch te wi'jen en te regenen, za'k jim vertellen. En alles staot even in et volle locht en d'r klinkt een gerommel en gebats, alderheiselikst!

'Onweer!' ropt de molle. 'Piepmoes, et is onweer, ik wil naor huus toe!' De molle rilt en trilt en is hielendal overstuur.

'Kalm, molle,' sust Piepmoes, die flinker liekt dan hi'j is. 'We kun hier niet weg, dat is te geveerlik. We kun niet aandere as de bujje ofwaachten.'

Flits... BATS! KNAL! Weer een zee van locht en een kebaol! De bujje hangt now krek boven de tente. Piepmoes krigt de bibbers now toch ok te pakken.

'Dddat ww.. wwwas percies bbb... boven oonze t..t..tente, molle,' piept hi'j. 'Et is m..m... mi'j n...n.. now dddichte genoeg b...b...bi'j... Wwww.. waor bin ie aenlik, m...m...molle,' schrikt hi'j. 'Ik zie je hielemaole n...n...niet meer!'

Waor hi'j ok kikt, de molle is nargens te zien. Mar d'r ligt wel een bultien grond in de hoeke van de tente. En d'r naost zit een gat. En inienen stikt de snute van de molle daor tot uut.

'Kom Piepmoes, hier henne. Et gat in, mitien.' En de snute is weer vot.

Piepmoes lat him drekt in et gat zakken en komt al gauw in een wat briedere gang terechte.

En laot dat now iene van de gangen wezen die naor et huus van de molle gaot. Even laeter zitten ze, beide de snuten onder et zaand, in et huus van de molle van de schrik te bekommen.

'Wat een toestaand,' zegt Piepmoes. 'Mar wat een gelok dat ie zo goed greven kunnen, molle.'

Now, dat is ok zo. Et was de molle inienen in 't zin scheuten dat d'r in die hoeke van Piepmoes zien tuun iene van zien mollegangen zitten mos. Hi'j had him niet langer bedocht en mitien an et greven gaon en was aenlik drekt in ien van zien eigen gangen uitkommen!


'Tsja,' zegt de molle en kikt de moes een betien ondeugend an, 'ie kun dan misschien knap kaortspeulen, mar as et op écht daenkward an komt, win ik makkelik van jow, Piepmoes!'

As ze de volgende morgen bi'j de tente kieken, ligt die hielemaole plat en verregend op 'e grond. Onder ien van de klieden ligt een kletsnat pakkien kaorten. Dat d'r zal veur de echte vekaansie begint wel een ere tente kommen moeten én een ni'j pakkien kaorten!

KAORTSPULLEGIES



In et verhael van Piepmoes bin Piepmoes en de molle an et kaortspeulen. Op disse bladziede hebben we daarom veur jim een peer aorige opdrachten bedocht die mit de kaorten van een kaortspul te maeken hebben. Hieronder laoten we eerst de tekens zien die in et kaortspul bruukt wodden:




Jim zien hiernaost zes kaorten door wat mit an de hand is.

Op elke kaorte mist was, of d'r klopt eers wat niet.



Kun jim de kaorten weer compleet maeken, of angeven wat as d'r niet goed is?

P I E P E S
M O E S



Teken zéls een mooie tente
in disse KLEURPLAETE

KREGEN TÓCH NOG EEN MOOIE
VEKAANSIE!

E N D E
M O L L E